


Deporte Local

Sir Jose "Chaco" Cornelio di bishita cerca Lotto

Renchi di "Hall of Fame" entrega na refereee Arubiano



ORANJESTAD (AAN): Director di Fundacion Lotto pa Deporte, Di-Stefano Wernet a ricibi bishita di Sir Jose "Chaco" Cornelio, kende ta refereee internacional di taekwondo pero alavez e ta den Hall of Fame. Sir Jose Cornelio a mustra e renchi cu el a ricibi despues di a drenta den "Hall of Fame".

Na aña 2013 Alberto Klaber di taekwondo y Sir Jose Cornelio ta e prome 2 Arubiano cu a drenta e Hall of Fame den Caribe. Sir Chaco Cornelio a para como refereee den diferente evento, mas cu 11 campeonato mundial, weganen olimpico na London, weganen olimpico na Singapore. Sir Jose Cornelio tin un trayectoria masha largo mes den e deporte di taekwondo.

Awendia e ta un di e personanan mas reconociden e mundo di deporte di taekwondo.

Sir Chaco Cornelio ta director di Hall of Fame di Caribe y e ta contento di a ricibi su renchi di Hall of Fame for di e comision na nivel mundial. E ta hopi orguyoso di ta e prome Arubiano cu ta destaca den e mundo di taekwondo. "Mi ta orguyoso di ta Arubiano y di por a representa Aruba den e mundo di taekwondo", asina el a expresa.

Di-Stefano Wernet tabata contento di por a topa cu Sir Chaco Cornelio, kendenan a papia riba diferente topico. E Director di Fundacion Lotto pa Deporte a yama Sir Chaco Cornelio pabien pa su reconocimento den Hall of Fame.

